



KEMENTERIAN WILAYAH PERSEKUTUAN

Aras G-7, Blok 2, Menara Seri Wilayah, Presint 2, 62100 Putrajaya

Tel: 03-8889 7888 Faks: 03-8889 7957

Laman web: www.kwp.gov.my

SIARAN MEDIA

TANGGUNGJAWAB ANGGOTA MAJLIS PERWAKILAN PENDUDUK WILAYAH PERSEKUTUAN (MPPWP) PARLIMEN LABUAN DIPERKUKUHKAN

LABUAN, 7 Jun 2020 – Watikah pelantikan anggota baharu Majlis Perwakilan Penduduk Wilayah Persekutuan (MPPWP) merangkumi seorang Pengerusi Zon dan 5 orang Pengerusi Sub Zon bagi parlimen Labuan diserahkan pada hari ini. Lantikan ini berkuatkuasa mulai 1 April 2020.

Kementerian Wilayah Persekutuan (KWP) telah membuat penyusunan semula pentadbiran pengurusan MPPWP bagi membolehkan perkhidmatan diberikan kepada komuniti lebih fokus dan menyeluruh hingga ke akar umbi. Penyelarasan penyusunan semula MPPWP di Kuala Lumpur, Putrajaya dan Labuan yang dibuat ini tidak memberi impak terhadap peruntukan kerajaan. Anggota MPPWP Kuala Lumpur dan Putrajaya diselaraskan kepada 6 Sub Zon bagi setiap parlimen yang mana sebelum ini mempunyai bilangan yang berbeza-beza. Oleh itu, MPPWP Sub Zon WP Labuan telah ditambah kepada 5 Sub Zon berbanding hanya 3 Sub Zon sebelum ini. Penyusunan semula ini dibuat setelah 6 tahun MPPWP ditubuhkan di Labuan supaya dapat mengukuhkan lagi objektif penubuhannya.

Pengerusi Zon dan Pengerusi Sub Zon MPPWP yang baharu dilantik ini harus memainkan peranan dalam menerajui perubahan minda masyarakat khususnya dalam usaha-usaha pembaharuan serta penambahbaikan yang dibawa oleh kerajaan. Malah dalam situasi menangani pandemik COVID-19 ini, wakil MPPWP juga perlu berperanan sebagai pasukan barisan hadapan (*frontliners*) bagi meningkatkan kesedaran dan literasi dalam kalangan komuniti Labuan untuk mengamalkan normal kehidupan baharu. Penambahan anggota MPPWP ini secara tidak langsung memberikan impak yang positif di mana WP Labuan kini adalah berstatus zon hijau wabak COVID-19.

MPPWP selaku penghubung di antara kerajaan dan rakyat perlu menyalurkan maklumat, maklum balas, aduan, masalah, permintaan atau keperluan penduduk kepada Perbadanan Labuan untuk mencari jalan penyelesaian terbaik. Hasrat kerajaan untuk mewujudkan struktur komuniti Wilayah Persekutuan yang mampu mengawal selia masyarakat setempat (*self-governance community*) dapat dilaksanakan melalui MPPWP ini. Diharapkan barisan MPPWP yang baharu ini sentiasa bekerjasama dan berganding bahu dengan pihak kerajaan serta melaksanakan tugas dengan penuh dedikasi dan berintegriti bagi memastikan semua inisiatif dan bantuan kerajaan dapat diterima dan difahami dengan jelas oleh rakyat.

YB Tan Sri TPr Annuar Hj. Bin Musa
Menteri Wilayah Persekutuan
7 Jun 2020